

傷寒發見論卷下

傷寒續論卷下

長洲張璐

男登
倬飛疇 參訂

從學郭求反三較正

藏結結胸痞篇

問曰病有結胸有藏結其狀何如答曰按之痛寸脉浮關脉沉名曰結胸也何謂藏結答曰如結胸狀飲食如故時時下利寸脉浮關脉小細沉緊名曰藏結舌上白胎滑者難治

結胸者陽邪結於陽也藏結者陰邪結於陰也然

胸位高藏位卑其脉之寸浮關沉兩俱無異但藏結之關脉更加小細而緊者以關脉居上下二焦之界外邪由此下結積氣由此上千實往來之要術所以病在下而脉反困於中也若見舌白胎滑則外邪固結於裏其勢最重以表裏兩解之法俱不可用故爲難治其不出方者正欲人深究其旨而施治非不治也治之務在分解表裏錯雜之邪使陰氣漸下而內消客邪漸上而外散庶可圖功於萬一也

藏結無陽證不往來惡寒其人反靜舌上胎滑者不可攻也

藏結之所以不可攻者從來置之不講以爲仲景
未嘗明言後人無從知之不知仲景言之甚明人
第不參討耳夫所謂不可攻者乃垂戒之辭正欲
人詳審其攻之之次第也試思藏已結矣匪攻而
結何由開耶所謂其外不解者尚未可攻又謂下
利嘔逆不可攻又謂表解乃可攻痞言之已悉於
此特出一訣謂藏結無陽證不往來寒熱其人反
靜則證不在六經之表裏而在上焦下焦之兩途
欲知其候但觀舌上有無胎滑有之則外感之陽
熱挾痞氣而反在下素痞之陰寒挾熱勢而反在
上此與裏證已具表證未除者相去不遠但其陰

陽悖逆格拒不入證轉凶危耳豈結胸膈內拒痛而藏結腹內不拒痛耶此而攻之是速其痛引陰筋而死不攻則病不除所以以攻爲戒是則調其陰陽使之相入而滑胎既退然後攻之則邪熱外散陽氣內消此持危扶顛之真手眼也

病脇下素有痞連在臍傍痛引少腹入陰筋者此名藏結死

按病人素有動氣在當臍上下左右則不可發汗素有痞氣在脇下連臍傍則不可攻下醫不細詢病家不明告因而貽禍者多矣

已上藏結例

病發於陽而反下之熱入因作結胸病發於陰而反下之因作痞所以成結胸者以下之太早故也

病發於陽者太陽表證誤下邪結於胸也病發於陰者皆是內挾痰飲外感風寒中氣先傷所以汗下不解而心下痞也凡結胸正在胸中此正太陽全盛之邪因誤下乘虛而入故曰熱入因作結胸是處方名爲陷胸若痞則多偏胸脇而無正中結痛之候故但言因作痞而不用熱入二字其邪之盛衰可知是處方名爲瀉心觀其主治則虛實迥然不侔則知表邪爲陽裏邪爲陰也明矣或言中風爲陽邪傷寒爲陰邪安有風傷衛氣氣受傷而

反變爲結胸寒傷營血血受傷而反成痞之理復有誤認直中陰寒之陰下早變成痞者則陰寒本無實熱何得有下早之變設陰結陰躁而誤下之立變危逆恐不至於成痞停日待變而死也

太陽病脈浮而動數浮則爲風數則爲熱動則爲痛數則爲虛頭痛發熱微盜汗出而反惡寒者表未解也醫反下之動數變遲膈內拒痛胃中空虛客氣動膈短氣躁煩心中懊憹陽氣內陷心下因鞅則爲結胸大陷胸湯主之若不結胸但頭汗出餘處無汗劑頸而還小便不利身必發黃也

脈浮而動數雖主風熱亦主正虛虛故邪持日久

頭痛發熱惡寒表終不解。醫不知其邪持太陽未傳他經。反誤下之。於是動數之脈變遲而在表之證變結胸矣。動數變遲三十六字。形容結胸之狀殆盡。蓋動數爲欲傳之脈。變遲則力綿勢緩而不能傳。口有結而難開之象。膈中之氣與外實之邪兩相格鬪。故爲拒痛。胃中水穀所生之精悍因誤下而致空虛。則不能藉之以衝開外邪。反爲外邪衝動其膈。於是正氣往返邪逼之界。覺短氣不足以息。更煩燥有加。遂至神明不安。無端而生懊憹。凡此皆陽邪內陷所致也。

結胸者。項亦強如柔痙狀。下之則和。宜大陷胸圓。

結胸而至頸項亦強證愈篤矣。蓋胸間邪結緊實。項勢常昂。有似柔痙之狀。然痙病身首俱張。此但項強。原非痙也。借此以驗胸。卽六分緊逼。以大陷胸湯下之。恐過而不留。卽以大陷胸圓下之。又恐滯而不行。故煮而連滓服之。然後與邪相當。觀方中用大黃芒硝甘遂。可謂峻矣。而更加葶藶杏仁。以射肺邪。而上行其急。煮時又倍加白蜜以留戀潤導之。而下行其緩。必識此意。始得用法之妙。

結胸證其脉浮大者不可下。下之則死。

胸旣結矣。本當下以開其結。然脉浮大則表邪未盡下之。是令結而又結也。所以致死。此見一誤不

堪而誤也

結胸證悉具煩躁者亦死。

亦字承上見結胸證全具更加煩躁卽不下亦主死也煩躁曷爲主死耶蓋邪結於胸雖藉藥力以開之而所以載藥力上行者胃氣也胃氣充溢於津液之內汗之津液一傷下之津液再傷至熱邪搏飲結於當胸而津液又急奔以應上正有不盡不已之勢胃氣垂絕能無敗乎此結胸諸法見幾於早競競以滌飲爲先務飲滌則津液自安矣傷寒六七日結胸熱實脉沉而緊心下痛按之石鞭者大陷胸湯主之。

熱實二字形容結胸之狀其明見邪熱填實於膈
間也。前條言寸脈浮關脈沉此言脈沉緊更明蓋
緊脈有浮沉之別浮緊主傷寒無汗沉緊主傷寒
結胸則知結胸非中風下早而成也。

傷寒十餘日熱結在裏復往來寒熱者與大柴胡湯
但結胸無寒熱者此爲水結在胸脇也但頭微汗出
者大陷胸湯主之。

治結胸證所用陷胸之法者以外邪挾內飲搏結
胸間未全入於裏也若十餘日熱結在裏則是無
形之邪熱蘊結必不定在胸上而非結胸明矣加
以往來寒熱仍兼半表當用大柴胡湯兩解表裏

之熱。庶其陷胸之義無取也。無大熱與上文熱實互意。內陷之邪。但結胸間。而表裏之熱。反不熾盛。是爲水飲結在胸脇。其人頭有微汗。乃邪在高而陽氣不得下達之明徵。此則主用大陷胸湯。允爲的對也。

太陽病重發汗而復下之。不大便五六日。舌上燥而渴。日晡所小有潮熱。從心下至少腹鞭滿而痛不可近者。大陷胸湯主之。

不大便秘燥渴。日晡潮熱。少腹鞭滿。證與陽明頗同。但小有潮熱。則不似陽明之大熱。從心下至少腹手不可近。則陽明又不似此大痛。因是辨其爲太

陽結胸脉陽明內實也緣誤汗誤下重傷津液不大便而燥渴潮熱更加痰飲內結必用陷胸湯由胸脇以及胃腸始得蕩滌無餘若但下腸胃結熱反遺膈上痰飲則非法矣。

太陽少陽併病而反下之成結胸心下鞅下利不止水漿不下其人心煩。

此條雖係併病以其反下之而成結胸當隨見所變之證而歸重於結胸也誤下之變乃致結胸下利。上下交征而陽明之居中者水漿不入心煩待斃傷寒顧可易言哉。

小結胸病正在心下按之則痛脉浮滑者小陷胸湯

主之。

小結胸病正在心下。則不似大結胸之高在心上也。按之則痛。比手不可近。則較輕也。而脉之浮又淺於沉滑。又緩於緊。可見其人外邪陷入。原微但痰飲素盛。挾熱邪而內結。所以脉見浮滑也。黃連半夏枯藁實藥。雖平而泄熱散結。亦是突圍而入。所以名爲小陷胸也。

寒實結胸。無熱證者。與三物小陷胸湯。白散亦可服。寒實結胸。乃寒飲結聚而無大熱也。意開小陷胸半夏枯藁實。足以去其痰飲。又慮黃連難祛寒實。故又主白散。取巴豆之辛熱。破結貝母之苦寒開。

鬱結梗載之上涌爲的當耳。

已上結胸例

傷寒汗出解之後胃中不和心下痞鞭乾噫食臭脇下有水氣腹中雷鳴下利者生薑瀉心湯主之。汗後外邪雖解是必胃氣安和始得脫然無恙以胃主津液故也。若有因邪入而內結因發汗而外亡兩相告匱其人心下必痞鞭以伏飲搏聚胃氣不足以開之也。胃病故乾噫食臭食入而噯餽酸也。胃病故水入而傍滲脇肋也。胃中水穀不行腹中必雷鳴而搏擊有聲下利而清濁不分也。雖不出誤下而止成痞設誤下之其痞結又當何似耶。

傷寒中風醫反下之。其人下利日數十行。穀不化。腹中雷鳴。心下痞硬而滿。乾嘔心煩。不得安。醫見心下痞。謂病不盡。復下之。其痞益甚。此非結熱。但以胃中虛。客氣上逆。故使輒也。甘草瀉心湯主之。

此條痞證。傷寒與中風互言。大意具見。可見病發於陰下之而成痞者。非指傷寒爲陰也。下利完穀。腹鳴嘔煩。皆誤下。而胃中空虛之互辭也。設不知此義。以爲結熱。而復下之。其痞必益甚。故重以胃中虛。客氣上逆。昭揭病因。方用甘草瀉心湯。即生薑瀉心湯。除去生薑。人參。而倍甘草。乾薑也。客邪乘虛結於心下。本當用人參。以誤而再誤。其痞

已極人參仁柔無剛決之方故不宜用生薑辛溫最宜用者然以氣並主散恐其頡津液上升客邪從之犯上故倍用萸薑代之以開痞而用甘草爲君坐鎮中州庶心下與腹中漸至寧泰耳今人但知以生薑代乾薑之儼孰知以乾薑代生薑之散哉但知甘草能增滿孰知甘草能去滿哉

傷寒五六日嘔而發熱者柴胡湯證具而以他藥下之柴胡證仍在者復與柴胡湯此雖已下之不爲逆必蒸蒸而振却發熱汗出而解若心下滿而鞭痛者此爲結胸也大陷胸湯主之但滿而不痛者此爲痞柴胡湯不中與之宜半夏瀉心湯